

Staðfesting forsetans á skipulagsskrá fyrir Minningarsjóð Jóns Ólafs Samúelssonar, Önnu Bjarnadóttur og Jóns Þórðarsonar frá Hvítadal, útgefin á venjulegan hátt að mandatunum af dómsmálaráðherra 31. ágúst 1967.

Skipulagsskráin er þannig:

SKIPULAGSSKRÁ

fyrir Minningarsjóð Jóns Ólafs Samúelssonar, Önnu Bjarnadóttur
og Jóns Þórðarsonar frá Hvítadal.

1. gr.

Sjóðurinn heitir Minningarsjóður Jóns Ólafs Samúelssonar, Önnu Bjarnadóttur og Jóns Þórðarsonar frá Hvítadal.

2. gr.

Sjóðurinn var stofnaður árið 1920 með fjárhæð kr. 1200.00 af Önnu Bjarnadóttur og Jóni Þórðarsyni frá Hvítadal og nokkrum félögum í U.M.F. Stjarnan, til minningar um Jón Ólaf Samúelsson.

Tilgangur sjóðsins var að verðlauna og hvetja menn til betri fóðrunar og meðferðar á öllum skepnum sínum.

3. gr.

Tilgangur sjóðsins samkvæmt 2. gr. er ekki lengur raunhæfur, þar sem öllum bændum er fyrir löngu ljóst, að þeirra hagræði er að hrista sem bezt öll húsdýr sín. Því er tilgangur sjóðs þessa nú, að kaupa trjáplöntur til handa bændum í Saurbæjarhreppi, sem hug hafa á að prýða umhverfis heimili sín með trjágróðri, eða félagssamtökum í Saurbæjarhreppi, sem tækju fyrir land til gróðursetningar trjáplantna. Á sama hátt og vel hirt búfé ber bóndanum vitni er trjálundur, hvar sem hann fyrirfinnst í landi okkar, vottur menningar og ræktarsemi við fósturjörðina.

4. gr.

Að samþykktum ofangreindum breytingum og að fengnum leyfum opinberra aðila leggur Elías Guðmundsson, fyrrum bóndi á Neðri-Brunná og börn hans, sjóðnum til kr. 10 000.00 til minningar um Önnu Bjarnadóttur og Jón Þórðarson frá Hvítadal, enda ber sjóðurinn einnig nöfn þeirra hjóna.

5. gr.

Sjóðinn, þ. e. höfuðstólinn má aldrei skerða, né heldur það fé, sem honum kann að berast síðar.

6. gr.

Starfssvið sjóðsins er aðeins innan takmarka Saurbæjarhrepps í Dalasýslu og tilheyrir U.M.F. Stjarnan.

7. gr.

Stjórn sjóðsins skulu hafa á hendi 3 menn, sem séu hreppstjóri Saurbæjarhrepps, sem ávallt skal sitja í stjórn hans, formaður U.M.F. Stjarnan og þriðji maður kosinn af U.M.F. Stjarnan.

Við forföll stjórnanda sjóðsins, hvern veg sem þeim er háttað, kjósa ungmennafélagar strax mann í hið auða sæti.

8. gr.

Árlega skal verja helmingi vaxta sjóðsins til kaupa á trjáplöntum, sem ganga til þeirra manna í Saurbæjarhreppi, sem hug hafa á þeim, og skulu stjórnendur sjóðsins hafa auga með, hvar þær kæmu bezt að notum. Umsóknir um trjáplöntur þessar þurfa ekki að berast, heldur skal stjórnin minna á tilveru sjóðsins og hvetja menn til gróðursetningar. Meðan sjóðurinn er lítils megnugur, skulu allar trjáplöntur hvers árs ganga til sama aðila.

9. gr.

Séu engar trjáplöntur keyptar eitthvert árið, skal leggja vextina óskerta við höfuðstólinn.

10. gr.

Sjóðinn skal ávaxta á tryggum stað, og ber stjórnin fulla ábyrgð á honum. Hún semur árlega reikninga fyrir sjóðinn, sem leggur undir úrskurði og samþykki ungmennafélagsins.

11. gr.

Hætti ungmennafélagsskapurinn eða leggist niður, þá tilheyrir sjóður þessi hreppsfélagi Saurbæjarhrepps, með óbreyttu fyrirkomulagi að öðru en því að atkvæðisbærir menn hreppsins velja stjórn hans og úrskurður reikninganna fellur undir sýslunefnd Dalasýslu.

12. gr.

Skipulagsskrá þessa skal innfæra í gjörðabók U.M.F. Stjarnan, einnig ársreikninga sjóðsins. Hver stjórnarmeðlimur hefur eitt eintak af skipulagsskrá þessari, svo skal og vera um reikninga sjóðsins. Reikningsár sjóðsins er almanaksárið. Á aðalfundi U.M.F. Stjarnan, skal útskurða reikninga sjóðsins og um leið kynna verksvið hans.

13. gr.

Á skipulagsskrá þessari, skal leita staðfestingar dóms- og kirkjumálaráðuneytisins.

AUGLÝSING

um notkun heimildar í 32. tl. 3. gr. tollskrárlaga um lækkun
flutningsgjalds með flugvélum í tollverði vöru.

Ráðuneytið hefur ákveðið að nota heimild í 32. tl. 3. gr. tollskrárlaga til þess að lækka flutningsgjald í tollverði vöru, þegar vara er flutt til landsins með flugvélum, um 50% frá raunverulegu flutningsgjaldi hverju sinni. Nær lækkunin eingöngu til flutningsgjalds þess hluta leiðarinnar, sem er eða getur verið samfelldur flutningur í þeirri flugvél, er vöruna flytur til landsins. Það skilyrði er sett fyrir framangreindri lækkun, að vara sé tollafgreidd og tekin úr afgreiðslu flugfélaganna innan 15 daga frá komudegi flugvélarinnar til landsins.

Framangreind lækkun kemur til framkvæmda nú þegar.

Fjármálaráðuneytið, 21. júlí 1967.

F. h. r.

Jón Sigurðsson.

Björn Hermannsson.